

Naalackersuisut Inatsisartut suleriaasianni § 33, imm. 4 naapertorlugu aalajangiiffigisassatut siunnersuummik imaattumik matumuuna Inatsisartunut saqqummiussaqrput:

Siunnersuut: Inatsisartut aalajangiiffigisassaattut siunnersuut Namminersorlutik Oqartussat akuersissutigissagaat Nunarsuarmioqatigiit ataatsimoorussamik isumaqatigiissutaat radioaktiviussut ikummatikut aamma radioaktiviussut eqqagassat isumannaatumik isumagineqartarnissaat pillugit (Eqqagassalerinermut isumaqatigiissut)

(Inuussutissarsiornermut, Suliffeqarnermut, Niuernermit Nunanullu Allanut Naalackersuisoq)

Tungavilersuut

Siunnersuut inassuteqaatit arlaqartut ”Uran-imik piianeq aamma avammut niueruteqartarneq pillugu nalunaarusiaq”-mi nalunaarneqarsimasut ilagaat.

Isumaqatigiissutip imai:

Isumaqatigiissut tassaavoq ”qiimmassaatitut” isumaqatigiissut, siunertaqartoq nunarsuarput tamakkerlugu atomip nukinganik ikummatikut aamma atomip nukinganit eqqagassanik isumaginninnermi qaffasissumik isumannaallisaanikkut aqqissuusaanermik ingerlatsiuaannartoqarnissaanut. Tamannalu ingerlanneqassaaq nunani namminerni aqqissuussinerit nukittorsarneqarnerisigut aammalu nunarsuarmioqatigiit suleqatigiinnerata nukittorsartuarneratigut, ukiut pingasukkaartumik nunat Review-imi ataatsimiinnertigut killiffimmut nalunaarusiortarnerisigut, nunat nalunaarusiaannik oqalliffiusunik, aammalu unammilligassanik nunallu namminneq atomip nukinganik ikummatikut radioaktiviussumillu eqqagassat suussusissarsarnerisigut suliniutillu nukittorsarneqarnerisigut ingerlanneqartunik.

Danmark-ip isumaqatigiissut ulloq 9. februar 1998 atsiorpaa akuersinerminullu allakkiani toqqortaritilerlugu IAEA-p generalsekretærianut, ulloq 3. september 1999.

Danmarks-ip Eqqagassalerinermut Isumaqatigiissummik akuersissuteqarnera Kalaallit Nunaannut atuutinngilaq, kisiannili Kalaallit Nunaannut atuuttussanngorlugu annertusineqarsinnaalluni. Eqqagassalerinermut Isumaqatigiissummi ersippoq aallaavittut eqqagassat nalinginnaasumik (pissusissamisoortumik) radioaktiviusunik akuutissanik akoqartut aallaavittut pineqanngitsut, eqqagassat atomip nukinganit ikummatissanik atuinermit attuumasuunngippata.

Allaffissornikkut aningaasaqarnikkullu pisortat ingerlatsineranut kingunerisassai

Kalaallit Nunaata isumaqatigiissut akuersissutigiguniuk tamatumalu kingorna Kalaallit Nunaata aatsitassanik radioaktiviussunik atomip nukinganik ikummatit atorneqarsinnaasunik piiasoqarnissaa akuersissutigiguniuk, taava Kalaallit Nunaat paasissutissanik nassiussisalissaaq nassuiassallugulu qanoq aqqissuussinikkut Kalaallit Nunaata qaarusunnit pineqartunit eqqagassat toqqortarisarnerai, kiisalu Kalaallit Nunaat qaarusunnut mattoqasunut qanoq periaaseqarnera.

Inuussutissarsiortunut allaffissornikkut aningaasaqarnikkullu kingunerisassai

Soqanngilaq

Attaveqarfigisassat

Oqaaseqaatip akuersissutigineqareerneratigut pisortaqarfiit suliameq susasaqartut attavigineqassapput Kalaallit Nunaanni atortuulersitsinissaaq siunertaralugu.

Tusarniaaneq

Inatsisartut aalajangiiffigisassaattut siunnersuut Naalackersuisut tusarniaasarnernut quppersagaanni saqqummiunneqarsimavoq piffissami 12. juni-miit 6. aggustimut 2015. Tusarniaassut tiguneqarsimanngilaq.

Taamatut oqaaseqarluta Naalackersuisut inassutigissavaat Inatsisartut aalajangiutissagaat Namminersorlutik Oqartussat akuersissutigissagaat nunarsuarmioqatigiit ataatsimoorussamik isumaqatigiissutaat, isumannaatsumik atomip nukinganik ikummatikut aamma eqqagassat radioaktiviussunik isumagineqartarnissaat pillugu.(Eqqagassalerinermut isumaqatigiissut)

Ilanngussaq:

- 1) Ikummatissat atorsimasat aamma eqqakkat radioaktiviussunik isumannaatsumik isumagineqartarneri pillugit nunat tamalaani ataatsimoorussatut isumaqatigiissutip eqikkarnera (Eqqakkanut isumaqatigiissut)
- 2) Nunarsuarmioqatigiit ataatsimoorussamik isumaqatigiissutaat, isumannaatsumik atomip nukinganik ikummatikut aamma eqqagassat radioaktiviussunik isumagineqartarnissaat pillugu. (Eqqagassalerinermut isumaqatigiissut)